

I. N. J. C.

7

PENTAS I. APHORISMORUM

DE

SOBRI STUDIO METAPHYSICES,

QUAM,

Adprob. Ampliss. Facult. Philos. Reg. Acad. Aboëns.

PRÆSES,

M^{AG.}. LAURENTIUS O.
LEFRÉN,

FACULT. PHILOS. ADJUNCT. ORDIN.

ET

RESPONDENS,

LAURENTIUS JOH. HALLMAN,

NERICIA SVIO-GOTHUS,

DEFENDENT,

Die 16 Maii Anni 1767.

L. H. A. M. S.

A B O Æ,

Impressit JOH. C. FRENCKELL.

Complura corpora naturalia, quæ valebant integra,
corrumptuntur saepius & abeunt in vermes: eodem
modo sana & solida rerum cognitio, si non dextre
tradicetur, saepenumero putrescit, & solvitur in subti-
les, vanas, insalubres, &, si ita loqui fas est, ver-
miculatas questiones, quæ motu quodam & vivacitate
nonnulla præditæ videntur, sed putidæ sunt & nullius
usus. HEIDANUS L. de Origine Erroris pag. 97.

PRÆFATIO.

Quantum ad firmitatem ædificii confert solidum posuisse fundamentum, & quantum ad securitatem oppidi conducit validum extruxisse munimentum; tantum ad florem & frugem omnium Philosophice partium prodest nobilissimæ Disciplinæ Metaphysicæ Sobrium impendisse Studium. Hoc facile constabit, si, qualem faciem olim ostenderit Philosophia, cum viri docti partim nullam, partim cœcam, partim ineptam in scientia nostra addiscenda operam ponerent, & qualem indolem naœta fuerit, ex quo hoc studium paulo diligentius excolere cœperunt eruditæ, nobis paulo distinctius ob oculos ponere velimus. Sed tantum ingredi campum nunc non permittit festinatio. Nec id quidem magnopere necessarium fuerit, cum nemo fere homo, qui se doctum videri velit, nunc ignorare possit, quantum distet hodiernus Philosophicæ splendor ab isto squalore, quo tum sepulta jacebat, cum nostrum Studium adhuc vel sub obscuro Aristotelis gallicinio dormitaret, vel sub confuso Scholasticorum crepusculo somniaret. Quidquid sit, hoc certum, nisi sobrium fuerit Studium, quod Metaphysicæ impenditur, acium esse tum de flore, tum de fruge, quam exinde sibi pollicetur Philosophia. Vimum modice sumptum homini optimam præbet medicinam, omnes corporis partes, mirum in modum, recreantem, refocillantem, exhilarantem; immodice vero ingestum uido cerebro vanum infundit delirium, quod verum rationis usum excutit, atque ex sapiente stolidum, ex prudente stultum facit. Eodem fere modo comparata est Metaphysica. Frugales gustus menti hominis, nescio quam, vel cogitandi dexteritatem, vel judicandi soliditatem, vel ratiocinandi maturitatem inspirant; geniales vero haustus sœpe toto cœlo diver-

A

sum

sum producunt effectum. Mens vacillare primum, mox titubare, tum cespitare, tandemque, vertigine correpta, nescio quæ monstra, prodigia, portenta per quietem videre incipit. Tristissimi hujus phænomini satis & multa & certa prostant exempla, quæ facile adduci possent, nisi res plane confessa videretur, maximis etjam ingeniis hoc crapulæ generi turbatis. Hoc vero ultimum potius deplorandum, quam demirandum esse, haud difficulter concedent omnes, qui ingenii humani partim Stupiditatem puram perversitatem non ignorant. Ex quo enim originalem amissimus veritatem, quæ omnium virium mentis tum rectitudinem tum firmitudinem involvebat, semper nimium quantum in extrema propendens, raroque admodum vel rite querimus vel recte invenimus lineam, quæ inter usum abusumq; rerum interjacet. Hoc tum aliis in rebus, tum in variis Scientiarum generibus, tota die cernitur. Quoniam vero in Literarum studiis, nunquam gravius peccatur, quam cum principia Scientiarum universalia corrumpuntur, facile intelligitur, quantum universæ intersit Philosophiæ, ut Disciplina Metaphysica, quæ ea enucleare debet, & sobrie & solide tradatur. Quod si igitur Sobrium & solidum Metaphysices studium luculentis quibusdam Aphorismis ita delineare valuerimus, ut, quid distent æra lupinis, paulo dilucidius intelligatur, nos non malam plane gratiam a bonis viris inituros speramus. Cumque hunc scopum hæc respiciat opella, Te, benevole Lector, quo decet, studio & officio, etjam atque etjam rogamus, ut, dum nos imaginem Sobrii Metaphysici in thesi delineamus, tu effigiem Sobrii Critici in praxi exhibeas. Quod si tanta feceris benignitate, quanta ego sinceritate eo eniti volo, ut hujus officiū non videar immemor, habebit uterque nostrum, de quo sibi in sinu gratulari possit.

APHO-

APHORISMUS I.

Tantum abest, ut omnes, qui se vel eximios *Theologos*, vel egregios *Philosophos* videri voluerunt, semper sobria *judicia* de meritis Disciplinæ *Metaphysicæ* protulerint, ut potius, ex utroque doctorum genere, omnibus prope modum ætatibus, non pauci sint reperti, qui, justum Scientiæ pretium ignorantes, nimium quantum, nunc in *excessu*, nunc in *defectu*, peccarunt. Alii, optimam *Scientiarum Reginam* salutantes, dignam judicarunt, quæ, infinitis ornata *encomiis*, ad *calum* usque extolleretur. Alii, contrarium secuti institutum, pessimam habuerunt *veneficam*, quæ optima quæque ingenia *abstractis nugamentis* corrumperet, ob eamque caussam digna esset, quæ innumeris onerata *conviciis* ad ipsum detruderetur *orcum*, ad Kalendas demum Græcas emersura. Interim aliqui passim reperti fuerunt, qui, pro aliis atque aliis temporum conditionibus, nunc liberius, nunc timidius, antiquam cecinerunt cantilenam:

Usus habet laudem crimen abusus habet.
Quam nos quoque sedulo inculcandam judicamus, alteram ipsi consonam addentes:

Medium tenuere beati.

ADNOTATIONES.

Quanti Aristoteles sua illa, sive inventa, sive ex-
cerpta, quæ rā μετά τὰ Φυσικά, incerto auctore, vul-
go adpellari solent, æstimaverit, id passim ex ipsis il-
lis quatuordecim Libris, quos de iis conscripsit, con-
stat, nominatim vero ex variis egregiis titulis, qui-
bus hoc opus ipse saepius ornat, quales sunt, tum ab-
soluti: *Sapientia*, *Theologia*, *Philosophia* &c. tum com-
positi: *Sapientia prima*, *Philosophia prima*, *Sciencia primi-
ceps*, *Scienciarum regina*, *Philosophia transcendentalis*
&c. Ferri utcunque potest hæc titulorum insolentia,
quandoquidem Aristoteles sua omnia ad Deum referit,
quem palmarium tractationis objectum sibi proposue-
rat, quamvis veram Dei ideam corruperit, ut infra
docebatur; id vero prorsus indignum, & nullo un-
quam pacto ferendum, quod Scholastici iisdem plane
titulis ornare non dubitarent *inanis* sua *lomnia*, quæ,
si pauca quædam grana, hic illic insparsa, exceperis,
partim irleptas *nugas*, partim odiosas *tricas*, partim,
nescio quas, abstractionum *præstigias* continebant, sub-
lato genuino & substituto fictitio Scientiæ objecto,
quod non nisi in vacuo ipsorum *cerebro* existeret. De
hac Metaphysica graviter celeberr. Sam. Christ. Holl-
mannus: *Tanta erat olim Metaphysicæ Scholasticæ indi-
gnitas*, ut illorum fere temporum recordari pæniteat,
quibus nostri quoque majores, ipsa licet quodammodo ne-
cessitate compulsi, illis se *nugis delandi*, maximisque ve-
luti *Mysteriis innutririri* passi sunt. Paulo Superius di-
xerat vir, si quis alius, acuti judicii: *Quod si infini-
tarum nugarum colluviem, terminorum, conceptibus va-*

erorum, promptuarium, rixarum innumerabiliam, bellorumque abstractorum armamentarium, contentiosorum hominum fomentum, imo simetum potius, optimorum ingeniorum ergastulum, ipsiusque veritatis pestem, illam dixerim, aut parum certe, aut non nimium saltem, dixerim. Vide Præf. ad Instit. Phil. Prim. Hæc omnia, si a tenuibus veritatis seminibus, quæ ad instar margaritarum in sterquilino latebant, recesseris, confessæ sunt veritatis. Quare Sapienter a spinis harum ineptiarum Juventutem Academicam defendere voluerunt b. m. Reges nostri, qui nobis Constituti. Acad. tradidierunt. Notatu digna sunt hæc verba: Noverint autem Theologie Professores, sibi severe prohibitum esse, ne Philosophicarum disputationum Scholastica commixtione, unde Pontificie tenebræ & abominationes olim exortæ sunt, Theologiam deforment. Vid. Cap. 19. de Lectionibus Philosophorum. Ex quo vero aliis atque aliis temporum vicissitudinibus, juvantibus ingenii felicioribus, longe purior & verior effluit Metaphysica, iniquum esset acerbius in eam invehi. Hinc in Laudatis Instituti. Acad. notanter præscribitur: Terminos & distinctiones, in Metaphysicis traditos, quæ insignem præ reliquis usum habent, breviter & sobrie explicabit. Vid. Cap. cit. Hæc ea sunt verba, quæ mihi occasionem hoc argumentum eligendi præbuerunt, quare hic præteriri non debuerunt, præsertim cum, nec nullas, nec cunctas Metaphysicorum meditationes insignis eujusdam utilitatis laudem tueri, dicant, sed certum relinquant delectum, sobrio iudicio instituendum. In primis vero hæc ideo excitare volui, ut adpareret, quam parum fidei

fidei mereantur rumores, quibus g. m. Rex GUSTAVUS ADOLPHUS, a quo laudatæ *Constitutiones Academicæ* sunt profectæ, olim inter Osores Metaphysicæ duriores relatus fuit. Perhibetur enim *Metaphysicam* toto regno suo proscriptisse. Vide b. Episc. D. And. Rydelii *Dissertat.* *Select.* *Decad.* II. *Disp.* I. p. m. 280. ubi Auctores rumoris adducuntur & refutantur. Inter eos, qui bonam *Metaphysicam* justo acrius censuerunt locum meretur Pet. Poiretus, qui eam inter *Scientias falsas* & noxias totam referre non dubitat *Libro de Erud. solid.* & superf. cui præluisit Hobbes in suo *Leviathan*, ubi ad regnum tenebrarum refertur. Eadem mens fuit Guil. Amesio, qui eam vocat *pestem* & *perniciem* *juventutis*. Hæc omnia verum *Scientiæ usum* non tollunt. Nam si quid veri judiciis virorum doctorum subest, id non totam *Disciplinæ substantiam*, sed aut certos *nayos*, quos nemo doctus & sanus negat, aut merum *abusum*, cui res etiam optimæ sæpius obnoxiae sunt, aut *studium minus sobrium* tangit. Contra hæc per nos licebit, cuiusunque volupe fuerit, cum Venceslao Schillingio, & visitationes *Metaphysicas* instituere & conciones satyricas habere; sed ea lege, ut diligenter caveant, ne ea, quæ innoxia & sincera sunt, simul in suspicionem pravitatis trahantur. Nec iis Auctor fuerim, ut vel ædito vel musico utantur Job. Langio, qui in sua *Mentis Medicina Metaphysicam* eundem inter *disciplinas usum habere*, scribit, quem inter *instrumenta musica* *crembalum*, nisi error sit typographicus, & pro *crembalo* dicere voluisset *cymbalum*. Vid. b. Rydelius l. c. Si igitur quod res est dicemus, neque vituperantibus, neque

que collaudantibus temere adhibenda fides, sed omnia
ad veritatem exigenda. Quod ipsa rei natura postu-
laverit, id dandum; quod illa non admiserit, id ne-
que obtrudendum. Neque enim tam stupidi sumus,
ut ignoremus, cum *balneo* non ejiciendum esse *infan-*
tulum, neque tam stolidi, ut *sordes* forte adhaerentes
idoneo *lixivio* eluendas negemus. Quod igitur de *lin-*
guia observavit *Aesopus*, cum hero persuadere vellet,
eandem & optimam & pessimam esse carnem, quæ in
macello veniat, id nobis de *Metaphysica* adfirmandum
existimamus, nihil *Metaphysica* nec *melius*, nec *pejus*
in Scholis nostris unquam doceri posse. Optima est
disciplina, dum, *sobrio* exulta *judicio*, reliquis scien-
tiis necessaria substernit *fundamenta*, quæ eis tum pro-
be *addiscendis*, tum recte *vindicandis* inserviant; pes-
sima vero evadit, cum, *nimiam* mentita *solertiam*, insa-
nire incipit, adeo ut illa ipsa scientiæ facula, qua æ-
des illustrare deberet, ad incendium excitandum abu-
tatur, quo totum conflagret ædificium. Verbo ut rem
complectar, omnem hanc quæstionem ad alium atque
alium οἰτον παιδίας redit & ipsam disciplinæ *substan-*
tiā non adtingit. Nunquam bene *educata Metaphy-*
sica nocuit, nunquam male *morata profuit*. Quemad-
modum enim nimia licentia quandoque in pertinacem
degenerat furorem, ita serium modestiæ studium o-
nenm sobrieratis laudem semper tueri solet. Omnem
virtutem in mediocritate consistere, certum est. Quis-
quis igitur *Metaphysicam* neque corrigi, neque perfici
debere dixerit, næ is ipsa stoliditate stolidior; quis-
quis vero eandem ex Scholis nostris penitus ejicien-
dam

dam ac eliminandam esse, somniaverit, is nescio quo insaniæ genere insaniat. Sed hæc haec tenus. Nunc ad alia,

APHORISMUS II.

In singulis Scientiis tria magna didactica sunt, nimirum Objectum, usum atque modum earum, quoad ejus fieri potest, adcurate perspicere. Quodcumque horum neglexeris, spem impunitatis frustra fovebis. Objectum arbori, modum floribus, usum fructibus adsimilavero. Hæc omnia induculo cohærent vinculo. Ubi nulla arbor, ibi nec floribus, nec fructibus est locus. Nec unquam fructuum dulcedinem gustaveris nisi florum pulchritudinem videris. Quis vero sterilem arborem facunda atque fructifera prætulerit, nisi omnem Sobrietatis laudem decoixerit. Quidquid igitur de sobrio Metaphysics studio nobis his paginis præcipiendum, id omne ad triplicem redibit questionem. Primum quidem quæremus, quænam illæ ipse sint veritates, quæ in hac Disciplina inculcari & demonstrari debeant? Deinde, quid adjumentiistarum veritatum liquida & solida cognitio ad officium nobis injunctum, tum sciendum, tum sciendum, conferat? Tum denique partim, quantus sit numerus veritatum, quæ huic fini inserviant? utrum

trum paucas an multas didicisse praestet? partim, quo
ordine ad singulas accedendum? qua prius, qua po-
sterius cognoscenda? partim denique, quantum stu-
dii ponendum in singulis? qua remissius? qua arden-
tius inquirenda? Et si quæ sint generis ejusdem.

ADNOTATIONES.

Singulis Scientiis propria competere objecta, cir-
ca quæ versentur, tam clara & certa est veritas, ut
plane extra controversiam posita videri debeat, nulla
demonstratione adhibita. Ratio igitur Sobrietatis inter-
alia hoc postulat, ut certo determinetur, quid in Me-
taphysica tractari, quid non tractari debeat. Quem.
admodum enim, ut rem exemplo illustrem, non lau-
danda videretur diligentia, si quis, prima verba Ge-
neseos: *In principio creavit Deus cælum & terram*, ex-
plicaturus, universam non Theologiam solum, sed et-
jam Astronomiam & Geographiam exponere adgredere-
tur, id quod a viro quodam docto factum aliquando
aceperimus; ita vix probanda est industria eorum, qui
tam spatiofam faciunt Metaphysicam, ut parum absit,
quin integrum quandam Scientiarum Encyclopædiam
constituat. Sed de hoc modo specialius. Ad usum per-
gimus. Primum quidem hic explodenda est sententia
Aristotelis, quæ omnem eruditio[n]is laudem ex pura
puta veritatis *theoria æstimare solebat*. Atque hoc gra-
viter urgendum existimaverim, quoties id idonea tu-
lerit occasio. Neque enim nostra ætate plane nulli
sunt, qui eundem errant errorem. Quamvis enim ne-

mo forte homo hodie apud nos inveniatur, quin in
thesi omnem Scientiæ laudem ex *usu ipsius practico æ-*
stimandam judicet; jure tamen vereor, ut omnes no-
stri homines idem *judicium* in *praxi* sequantur. Quid?
quod periculum sit, ne oppido paucos invenias, qui
hic omne ferant punctum. Sed hoc ulcus tangere o-
diosum. Illud tamen confidenter assevero, proprium
esse sobrii ingenii levia, inania, bella, speciosa nihili
ducere, gravia vero, solida, frugifera & pretiosa ma-
ximi facere. Hinc *ut cuique maxime sobrium* conti-
gerit palatum, ita summo studio in id incubit, *ut*
non tantum, quid in unaquaque re verum, aut falsum,
sed etiam, quid utile, aut inutile sit, quoad licet, ad-
curate intelligat. Neque is sano utitur *judicio*, qui in-
super habet veritates, quæ minus immediate in praxin
vitæ influunt. Sæpe enim quantivis pretii etiam re-
motissimas esse, certum est. Hujus generis sunt plu-
*rimæ veritates Metaphysicæ fundamentales, quarum pon-*dus non sentiunt imperiti & empirici.* Quid? quod
valde tenuem sobrietatis laudem merearis, necesse sit,
nisi in utroque veritatum genere, pluribus propositis
utilibus, quodnam utilius sit, diligenter quærere insti-
tias. Tantum abest, *ut sola veri theoria totam viri*
docti ideam impleat! Quod vero ad modum *sciendi at-*
tinet, potius qualitas, quam quantitas Scientiæ spectan-
da. Neque enim, *quam multa, sed quam proba fue-*
rint, quæ didiceris, quærendum. Non *ulna, sed li-*
bra, non pede, sed pondere eruditionem metiuntur Sa-
pientes. Sed hoc tamen ita velim intelligas, *ut ne*
multa didicisse in vitiis ponas. Neminem enim homi-
*nem**

nem unquam pœnitabit, quantum didicerit, modo quid-
quid cognoverit, id aptum natum existat, ex quo vel
vita, vel Schola aliquid utilitatis percipiat. Nec omnis
improbanda est diligentia, quæ rebus abstrusis & ob-
scuris tribuitur. Fieri enim potest, ut quis margari-
tas in sterquilinio inveniat. Raro tamen usu venit, ut
ubi Asinos quæris, ibi regnum invenias. Aliud fortunæ,
aliud prudentiæ munus. Præterea hæc Sobrietatis re-
gula, probe tenenda, non tam ingessisse, quam diges-
sse, haberri laudabile. Satius est pauca solide scire,
quam cæcum eruditionis acervum congerere, in quo
mera regnet confusio,

Nec quidquam, nisi pondus iners, congestaque eodem
Non bene junctarum discordia semina rerum.

Tandem & hoc mature cogitandum, ad modum ve-
hementer pertinere, ut finis, ordinis & ardoris juxta
habeatur ratio. Ad finem quodammodo spectant, quæ
de usu modo monuimus. Hic vero idem paulo spe-
cialius exposuisse juvabit. Quemadmodum igitur ordo
postulat, ut ea prius discas, quæ maturius ad salutem
conducunt, & ardoris ratio exigit, ut ea ferventius,
quæ vehementius ad caritatem, ut verbis b. Bernhardi
utar; ita quod ad fines adtinet, tota cura huc redi-
bit, ut semper bonos, veros, rectos, nunquam vero ma-
los, spurios, obliquos consepteris. Qui prioris sunt or-
dinis, ii studio gloriæ divinæ & desiderio commodi hu-
mani determinantur. Reliqua finium caterva, quæ nu-
merum pravorum constituunt, quamvis plausta fatui-
tum & pravitatum vehat, quidquid tamen in ea vel
malesani, vel perversi, vel scelerati continetur, id omne,

nisi valde fallor, ad Sacram hanc trigam: Speciosam
 sciendi curiositatem, ambitiosam eminendi cupiditatem
 & flagitosam ditescendi aviditatem, redit. Hinc non
 minus nervose, quam adposite b. BERNHARDUS, sunt,
 inquit, qui scire volunt eo fine tantum, ut sciant, &
 turpis curiositas est. Et sunt qui scire volunt, ut scian-
 tur ipsis, & turpis vanitas est. - - - Scire iuum nihil
 est, nisi te scire hoc, sciat alter. Et sunt item, qui
 scire volunt, ut scientiam suam vendant, verbi causa,
 pro pecunia, pro honoribus, & turpis quaestus est. Sed
 sunt quoque, qui scire volunt, ut edificant, & caritas
 est. Et item, qui scire volunt, ut edificantur & pru-
 dentia est. Horum omnium soli ultimi duo non inve-
 niuntur in abusione scientie, quippe qui ad hoc volunt
 intelligere, ut bene faciant. Vide Tom. II. Serm. XXXVI.
 p. 62. Lit. D. Edit. Lugdun. 1679. Hinc ut quisque præ-
 stantissimus vel Theologus, vel Philosophus est, ita &
 diligentissime & constantissime id agit, ut, etiamsi in
 purissime theoretico, maximeque abstracto versetur ar-
 gumento, semper alterum quasi oculum in tbesin veri,
 alterum in praxin boni directum habeat, defixumque.

APHORISMUS III.

His breviter indigitatis, jam paulo distin-
 ctius exponendum, quid singula haec momen-
 ta seorsim a sobrietate *Metaphysicorum* efflagitent,
 si utilissimae eorum disciplinæ nihil nec verita-
 tis, nec bonitatis derogabitur. Ac de ipso qui-
 dem

dem objecto, ut, quæ nobis sedeat sententia, initio dicamus, nihil ipsi nec turpius, nec tristius accidere unquam posse, arbitramur, quam cum eo stoliditatis progrediuntur, qui ejus se vel studiosos, vel magistros profitentur, ut in puris putis verborum corticibus hæreant, neglecto interea nucleo, quem *res ipsæ* constituunt. Tantum enim abest, ut nomen veri ac boni tueatur *Metaphysici*, qui *notionibus* indulget *deceptricibus*, sonis mente *cassis* ludens, ut ne tam quidem talis haberi debeat, cum *abstractionibus* justo *subtilioribus* invigilat. Quamvis enim iniqui essemus, si eos omnes, qui istam quasi *spumam notionum horridis* quibusdam *terminis* repræsentare satagunt, nihil nisi *bilinea rectilinea* chartæ illinere diceremus, nullam tamen injuriā iis fieri, existimamus, si, rem fere eodem recidere, statuerimus. Præterquam enim, quod *idea illa nimis abstracta*, ob incredibilem utilitatis parvitatem, perinde æstimari possunt, ac si plane nullæ essent, usu etiam sæpius venit, ut, dum alii in istas *difficiles nugas* incidunt, partim *meros vocabulorum sonos* auribus hauriant, partim singulis formulis *fictum subjiciant sensum*, eumque infinitis mo-

dis

dis varium, prout cujusque tulerit imaginatio. Nam paucis Sphingem domi habere licet, quæ obscuriora ejusmodi ænigmata expeditat, quippe quod illis fere solis obtingit, qui istis tricis innutriti sunt. Certe communem ingeniorum vel acrimoniam, vel patientiam superant, ut nihil dicam de angustia temporis, quæ sæpe non permittit, ut quis omnes percurrat *analysis notionum*, quibus forte usus fuerit loquens, vel scribens priusquam ad istum subtilitatis gradum ascendere potuerit, in quo se nunc vanius quam sanius jactat, nihil nisi *fatuam* quandam *vappam* propinans lectoribus, qui *spiritum exspectant rectificatisimum.*

ADNOTATIONES.

Ad interiora rerum penetralia nonnisi magno labore & multo sudore perveniri, certum est. Nihil igitur mirum, si opinione sæpius usu veniat, ut viris etjam doctis *ultra verba sapere* non liceat. Quamvis enim pauci reperiantur qui hoc satis & distincte *cognoscant* & ingenue *adgnoscant*, nihil tamen nec usitatus, nec communius esse, domestica cujusque experientia docet, modo eam auscultare velit. Rem certe extra controversiam ponunt infinita *doctorum bella*, quas *Logomachias* vocamus, & quarum singula scientiarum genera semper fuerunt feracissima. Tot *jurij*

gia, tot litigia de lana caprina, quot omnibus fere æ-
 tatis, instar macularum, in docto nomine invetera-
 runt, quid aliud demonstrant, quam quod diximus,
 vulgus eruditorum, suum aliquod solenne tum facere,
 cum, præteritis rerum momentis, ex litteris & syllabis,
 nescio quem eruditionis thesaurum exculpere satagunt.
 Et sane quotus est quisque hominum, et jam eruditissi-
 morum, cui tam sincera doctrina, tam solida contigerit
 scientia, ut, quanta quanta sit, ex meris constet nucleis,
 nihil nisi verum succum vehentibus & sanum præbenti-
 bus gustum, quo animus ad officium faciendum ner-
 vosior ac robustior evadat? Tantæ curæ, tantæ ope-
 ræ est per omnia vere realem adquirere cognitionem,
 ut ne maximis quidem ingeniis tantam sibi volunta-
 tem, tantam felicitatem gratulari liceat. Variæ sunt
 causæ, quæ ad hunc effectum producendum concur-
 runt, quas tamen hic recensere non permittit loci
 angustia. Inter alias hæc opinione latius patet, quod
 multa discamus pueri, quæ nobis intelligere & compre-
 hendere videatur, quamvis revera nec intelligamus, nec
 comprehendamus, notionibus contenti imiginariis, quas
 tota deinde vita retinemus, nisi subinde singulares exi-
 stant occasiones, quæ initio neglectum meditandi officium
 resumere ac renovare jubeant. Nescio vero an ulla
 alia in Disciplina hic error sæpius committatur, quam
 in Metaphysica, ut nubem pro Junone amplectamur. Cer-
 te si vel Aristotelicam vel Scholasticam examinare veli-
 mus Metaphysicam, in omnibus fere angulis plaustra
 inveniemus terminorum, qui, genuina rerum symbola
 mentientes, nihil nisi otiosorum ingeniorum inania so-
 mnia

mnia exhibere reperientur, ubi recte evigilaverimus, ad veram rerum substantiam, quam ad vana earum simulacra adtentiores. Nec e longinquo petenda est ratio. Quemadmodum enim hæc laus experientia debetur, quod quidquid solidæ scientiæ mortales acquirere possint, id aut producat, aut stabilitat, ita necesse est, ut quo longius ab hac matre doctrinarum ad otiosarum speculationum & speciosarum abstractionum meteora, quæ ingenii humani quasi pellices sunt, recedamus, eo & inanior & opacior evadat cognitio, perinde ac aëris terræ proximus multo & lucidior & salubrior est, propter copiosiorem radiorum solarium condensationem, quæ ibi locum habet, quam qui in montibus quibusdam altioribus hospitetur, etjamsi hic subtlerior, ille crassior existat.

APHORISMUS IV.

Quemadmodum vero qui de *rebus* judicat domesticis, nemini laudem sobrietatis tribuit ex eo capite, quod nihil ingerere soleat, nisi quod vere cibus, aut vere potus sit, ita nec *sobrium* est studium, quod *Metaphysicæ* impenditur, si hoc duntaxat laudis habeat, quod non versetur circa inania rerum simulacra, sed res ipsas omnino pro objecto habeat. Necesse igitur est, ut, ulterius progressi, ipsam tum qualitatem tum quantitatem earum rerum, quas *Sobrius Metaphysicus* tra-

tractat, paulo distinctius determinemus. Sed cum hæ quidem quæstiones partim ad *usum*, partim ad *modum* pertinere videantur, de quibus deinceps agendum, hic contenti erimus quæsi-
visse, quænam proprie sit *Scientia*, quam suam
vocat *Metaphysicus*? quam late ea pateat? Et quibus
tandem limitibus circumscrribatur? Si ad mentem
magni illius BACONIS de VERULAMIO universam
Philosophiam instar viridis cujusdam *arboris* con-
cipere velimus, ad *Metaphysicam* pertinere dice-
rem ea omnia, quæ *ipsum* quasi *truncum* consti-
tuunt, quoad se integrum ac continuum exhi-
bet, necdum in varios dividitur *ramos*, quos u-
na secum, e *radice* communi prognatos, suspen-
tat. Quænam vero hæc alia sunt, quam *notio-*
nes illæ *communes* & *axiomata generalia*, quæ ad
omnia *Scientiarum* genera ita pertinent, ut sin-
gula iisdem, tanquam *radicii communi*, innitantur,
indeque & nutrimenta & firmamenta habeant.

ADNOTATIONES.

His præstructis, facile intelligitur, nec *Ontologiam*
Aristotelicam, quæ de Deo agebat, nec *monstruosam* illam
disciplinam, quam eodem nomine insignebat *Scholasti-*
ci, ad objectum nostræ scientiæ proprie pertinere. Par-
modo ex eadem excludendæ sunt *tres posteriores par-*

res Metaphysicæ Wolfianæ, quippe quæ certos quasi ramos, non ipsum truncum laudatæ Arboris Philosophicæ constituunt. Multo adhuc minus adoptare possumus notionem Metaphysicæ, quam eruditis propinavit Cartesiana Philosophia sectator strenuissimus Arn. Geulinx, qui eam definivit primæ scientiæ & aliarum cum ea perpetuo nexu coherentium complexionem. Prorsus vero aliena est Metaphysica subtilissimi Tschirnhausenii, quæ pro objecto habeat summum bonum, nempe tranquillitatem animi & pacem conscientiæ. Nec magis placet opinio doctissimi Syrbii, qui, Metaphysica, inquit, quatenus ab Architectonica & Ontologia distinguitur, nihil est aliud, quam disciplina, res occultas & ex traditione oblatas, vel ad Divinæ Revelationis, vel ad rectæ rationis principia exigens. Metaphysica vero magica, quam Campanella conscripsit, ad profana pertinet commenta. Quod si vero adgnoscenda erit Metaphysica, quæ Magiam aliquam, sed veram & bonam, tradat, ea nulla alia esse poterit, quam indagatio & expositio caussarum formalium, quas adhuc in desideratis esse, constat; utrum vero ad eas unquam pertingere possit industria humana, non definimus, qui formam animæ adhuc ignoramus, ob eamque caussam, quantum ab ea præstari possit, non perspicimus.

APHORISMUS V.

Quemadmodum vero hactenus breviter vidi mus, non sanum esse studium Metaphysices, nisi, quæ ei subjecta est materia, quam tractet, ea illis

illis ipsis contenta fuerit *doctrinis*, quæ omnibus Philosophiæ partibus *communes* sint; ita nunc postulat ratio ordinis, ut videamus, *num in his ipsis sobrii sit eo progredi, quo liceat? an vero alia negligere, alia explicare consultius videatur?* Quis igitur non sentit, hic adhibendum esse *modum & consulendum usum*. Quamvis enim quæstio aliqua pertineat ad *objectum* hactenus determinatum, ideo tamen statim evictum non est, eam debere excuti. Regula igitur generalis hæc esto: *manendum in doctrinis primariis, videndumq; ne, assutis secundariis, his aliquid incommodi adnascatur.* Si hanc prudentiam semper adhibuissent Metaphysici, multo hodie solidiori uteremur *Metaphysica*. *Nihil enim ad florem & frugem vehementius pertinet, quam in paucis, iisque certis, manere, præcisæ universis, quæ nec fundamenti, nec firmamenti rationem habent.* Sed hunc *modum* semper sequi, nec unquam quidquam admittere, quod verum *usum* non habeat, hoc opus, hic labor est, ex quo *ingenium humanum* semel *luxuriare cœpit*.

ADNOTATIONES.

Nihil unquam nec publicis, nec privatis in rebus plus habet vel utilitatis, vel jucunditatis, quam sobriam tenere doctrinam de indole caffarum, tum internarum,

ad quas materiam & formam, tum externarum, ad quas
 efficientes & finales referre solent, qui de his rebus præ-
 cipiunt. Nihilo tamen minus jure vereor, ut ulla alta
 inveniatur particula Metaphysices, in qua aut saepius, aut
 gravius hallucinati fuerint Philosophi, doctrinis prima-
 riis alias atque alias addendo secundarias, quas expe-
 rientia dudum partim dubias, partim falsas, partim no-
 xias invenit. Sic Plato olim pro eo, quo fuit ingenii
 acumine, verum scientiae objectum in formis rerum quæ-
 ri debere, perspexit. Tantum vero abest, ut is veras
 invenerit formas, ut potius, easdem non in materia de-
 terminatas, sed a materia abstractas quærendo, illum in-
 triduxerit morbum, qui universam deinceps tum Physi-
 cam, tum Theologiam corruptit. Cui non in mentem venit,
 idealismum, fanaticismum & innumera alia monstra in-
 de exitisse, quod erudit, in questionibus ad hoc genus caus-
 se spectantiibus, minus sobrii fuerint. Quod ad caus-
 sam materialem adtinet, nemo sane homo ignorat, quan-
 tum de ea omni tempore litigatum fuerit, quantaque
 seges intium quæstionum hinc creverit. Nullum vero ne-
 que, turpius, neque tristius documentum delirii Metaphy-
 sici invenimus, quam quod viri, alias acutissimi & eru-
 ditissimi, tum produnt, cum vesano & inepto systema-
 tis amore, ob levissima quæque præjudicia, veritates ma-
 xime fundamentates convellere satagunt. Incredibile vi-
 deretur, nisi quotidiana constaret experientia, eo levitatis
 progreedi posse homines, qui se aliis ingenio ac ju-
 dicio superiores videri volunt, ut prolixis scriptis labe-
 factare conentur veritates quascunque proverbiales, quæ
 indocto vulgo & barbaris etjam populis habentur cer-
 tissi-

tissimæ, quæque ipsi pro talibus habent quoties major aliqua necessitas opinionis vanitatem redarguit. Sic, verbi caussa, cum de caussis efficientibus disputant, & quaestio incidit de rationibus agentes determinantibus, sæpe adeo tenuiter de libertate mentis scribunt, ut parum abesse videatur, quin animam in parum putam convertant machinam, quæ moti vis haud aliter ad agendum determinetur, ac molendinum aquis, vel ventis. Num hoc sit sobrie philosophari, sæpe rectius non arguitur, quam ex vita ipsorum, quæ non raro melius cum ratione communi, quam cum opinione singulari congruit. Hic opportune in mentem venient verba Doctissimi Crousazii, qui scribit: *Il y a des erreurs, qui ne peuvent jamais triompher entierement de la nature. Il y a des préventions, qu' on defend avec chaleur, dès que quelcun les conteste, mais qu' on ne suit de tout point, dès le moment, qu' on cesse d'y faire une attention expresse.* On pense, on parle, on agit tout, comme si on étoit dans les principes opposés. C'est là l'état, p. e. d'un homme, qui nie la liberté, qui s'est mit en tête, que tout est mechanisme, au dedans, au dehors, dans les corps & dans les esprits. Car dans l'occasion il delibere, il pese les raisons de coté & d'autre &c. Quelle comedie, si tout est machine! J'aimerois autant, qu' on fit des compliment au vent de Nord, & qu'on querellat celui du Midi, quand on a besoin de l'un, & que l'autre vient à la traverse. Logique P. II. Gh. IV. p. 100. seq. *Quisquis igitur sobrio Metaphysices studio tenetur, is nihil dicit, nihil scribit, quod sensui communii repugnat.* Absurdum enim est sapientiam in stultitia & gloriam in ignominia querere. Quid enim stultus, quam dubitare de iis, quæ vel pueris sunt

sunt perspecta? Quid turpius, quam ea in controversiam vocare, quæ vel femellis exploratæ sunt certitudinis? Quocirca nomini Philosophico dedecori sunt, quæ scribit Celeb. P. D. Huetius, cum ad Pyrrhonismum sibi objectum sic respondet: *Autre chose est de vivre, autre chose de philosopher. Lors qu'il s'agit de conduire sa vie, & de s'acquitter de ses devoirs, nous cessons d'être Philosophes, d'être contrarians, douteux, incertains, nous devons idiots, simples, credules, nous appelons les choses par leur nom.* Tr. Philos. de la foibleſſe de l'esprit Humain L. III. Ch. IX. Pronum hic eſſet, propositis veritatis primariis, non paucis ſed multis, varia adnotare dubia, quæ minus ſobrium Metaphyſices ſtudium, fuſcitatit quæſtionibus ſecundariis, peperit, atque ad singula monere, quomodo, reſectis ſupervacuis, in ſolis neceſſariis quiescere debeamus, ſed quoniam hoc nec temporis ratio, nec facultates Doctissimi D:ni Respondentis permittunt, ſolidiorem totius argumenti tractationem in aliud tempus rejicimus, quo ordinatus atque adcuratius persequi liceat ea, quæ ad uſum & modum Metaphyſicæ ſobrie tractandæ pertinent. Quod ſi vero, quæ hic in gulfum proposuimus, lucernam olere non videantur, faciles concedemus. Neque enim hoc nobis agendum fuit. *Sobrium commendavimus ſtudium, illudque liberius, quam ſervilius tractandum duximus.* Sufficit ſi vera, ſana, ſobria fint, quæ ſcripſimus. Et ſi forte quid irrepererit, quod ne hanc quidem laudem tueri poſſit, optime de nobis merebitur, qui liberaliter monuerit.